

曲江張先生文集

曲江張先生文集

曲江集序

古今說者咸曰唐相張文獻公嶺南第一流人物也嗟乎公之人物豈但超出嶺南而已哉蓋自三代以至于唐人才之生盛在江北開元天寶以前南士未有以科第顯者而公首以道侔伊呂科進未有以詞翰顯者而公首掌制誥內供奉未有以相業顯者而公首相玄宗公薨後四十餘年浙士始有陸敬輿閩士始有歐陽行周又二百四十餘年江西之士始有歐陽永叔王介甫諸人起於易代之後由是以觀公非但超出嶺南蓋江以南第一流人物也公之風度先知見重於玄宗氣節功業著在信史播揚於天下後世唐三百年賢相前稱房杜後稱姚宋胡明仲謂姚非宋比可

與宋齊名者公也由是以觀公又非但超出江南乃有唐一代第一流人物也然公聲名燁燁在人口耳非直以其相業在當時且甚有文名史稱其七歲知屬文張說謂其為後出詞人之冠又與徐堅評其文如輕縑素練實濟時用柳宗元亦謂其能比興兼者述予生公六百餘年之後慕公之為人童稚時嘗得韶郡所刻金鑑錄讀之灼知其偽有志求公全集刻梓以行世自來

京師游太學入官翰林每遇藏書家輒訪求之竟不可得蓋餘二十年矣歲己丑始得公曲江集於館閣群書中手自鈎錄僅成帙聞先妣太宜人喪因携南歸期免喪後自備梓刻之道韶道友人五羊涂君暉倅郡偶語及之太守毘陵蘇

君諱同知莆田方君新謂公此集乃韶
之文獻請留刻郡齋嗟乎公之相業世
孰不知其文則不盡知也矧是集藏館
閣中舉世無由而見苟非為鄉後進者
表而出之天下後世安知其終不泯泯
也哉是以不揆愚陋僭書其首
成化九年龍集癸巳仲春初吉

翰林院侍

講學士瓊臺丘濬序

唐丞相曲江張先生文集卷之一

頌贊賦

龍池聖德頌并序

開元紀功德頌并序

聖應圖贊并序

開元正歷握乾符頌并序

白羽扇賦并序及御批

荔枝賦并序

龍池聖德頌

臣聞昔者玄德升闡皇天眷命元聖有作上帝何言
必見意於休徵不忘象於幽贊惟茲降鑒若曰專精
道周萬物者其神充功濟生人者其祥大粵若古始
肇有君臣巢燧之前寂寞無紀書契而後煥炳可觀
若乃鬼神睢盱品彙紛錯性命未正吉凶不定而太
昊氏將通其德則河爲之出圖人食未粒鳥獸是茹
時不耕稼器無耒耜而神農氏將教其本則天爲之
雨粟蚩尤不道炎帝不制銅鐵鑄兵豺狼橫厲而軒
轅氏將禁其暴則天爲之降玄女洪水方割下人昏
墊堯德莫弭其災舜功不能除其害而夏后氏將
底其績則洛爲之出書自茲以還殆三千歲矣其間

木火更王雲物告符有若狼銜鈎魚躍舟素靈哭黃
星見豈不以湯德有慙武善未盡漢道既維魏方亦
偏唯以一至之應且爲興王之兆則未有錫真符聖
受明命遠與大禹相續超與上皇比崇如我國家之
盛者焉洪惟龍池蓋天之所以祚聖即今上下居之
舊真京師爽塏之所傍無簣澤中勿蘆泉非常而靈
液涓流無幾而神池浸廣榮光休氣若煙若雲所未
嘗有則此之出清可以鑑而深不見底鱗介現詭於
初其中時莫知其所然日徒見其有異中宗採識者
之議壓王氣而來遊聖上處或躍之時出飛龍而合
應臨淄始封也邸第在馬上黨歷試也靈符紹至天
其以是求命我唐圖象丁寧有所底止其若茲也夫
成數有時而否至理無代而亡固在乎大聖之生乘
運而作鼓天下之動安天下之危故將順成功自古
之啓佑也如彼充定多難自天之叶贊也如此初中
宗韋氏后黨窺隙大盜狃於得志羣慝起而擅權若
綏旒然當此時也天與若不取鬼謀或不協則我祖
宗之業無乃將墜而億兆之命亦猶倒懸聖上感之
提劍而起雷霆一奮沃殄以清內難旣衰外虞有謐
推戴太上照臨萬邦實天之爲與人更始系皇統維

乾綱決綻補壞蕩瑕滌穢而乃闕典咸備舊章悉舉
處窮盡達在困必通品物資以再生寰區爲之一變
然後返華僞於朴還澆漓於淳以大道爲原以至仁
爲根動推是心以御於事人見德而興行神享誠而
介福故不在於刑罰不在於禱請大造裁成玄猷允
塞有如陽春播澤觸類皆滋太山起雲無遠不徧雖
昆虫草木與蠻貊要荒樂其所生安其所習在牛羊
而勿踐有干戈而載戢又況於衣冠華夏禮樂家邦
而不刑於斯湏不久於漸漬者也夫然何教非德何
化非經何能事之不舉何醇精之未極周溥洋溢於
穆緝熙至於太和莫不允若體侔天地之大事出皇
王之表豈擊蹠曲拳盡禮極力將用彥聖不啻其口
所能稱誦於吾君所可殆庶於至德且往者之有開
也天感精以降聖聖敬命以奉天此誠有元則欽明
文思及茲報本必嚴祇齋栗靈慶以屬之神化以答
之與初相明其徵乃著絲綸先兆非篤信歟由是言
之統天者人合符者聖而差德序命殊尤卓絕豈多
乎哉至如古之興王必有所感五帝更尚五運旁通
土者黃中之精於金爲王水者善利之物於土爲配
苟膺期而有來必合德而爲表是則然矣天其或者

亦以阜育群化發揮茂祉始告以聖有明徵終成乎
帝之神冊因其立象之本會以相乘之數則載代六
百歷紀千年變而通之胡可量也宗子宗正卿褒信
郡王璆等若干人伯父伯兄仲叔季弟聚族相與詣
闕上言天意昭著固已久矣人事符合亦云至矣而
一德是建太階既平靈臺靈沼赫赫明明天之爲大
雖莫能名皇王之鎬豈無頌聲上初克讓抑而未許
至於累請乃曰俞哉史臣不敏敢獻頌曰

茫茫元昊載凝載薄在帝庖犧繼天而作浩浩洪水
包山襄陵舜亦命禹夏氏以興龍圖龜書二王是膺
湯武已下夫何足徵

右元命

於鑠巨唐乘運而起續禹之迹系堯之紀五聖在天
不命曾孫高視河洛同符混元亦有黃龍出於靈沼
明明穆穆天子之表

右聖德

倬彼東井昭章于天沉精降液下爲靈泉靈泉有泚
其深無底泌之洋洋其甘如醴清德之鑑柔道之體
洪源清規實天之啓

右靈泉

濯濯靈泉洞冥皇祇滋液流行化爲神池曰止曰行
惟聖之作匪鱣匪鮪惟龍之躍植物斯生動物斯樂
天眼有見曾是不涸

右神池

靈有休氣紛紛郁郁如山之包如雲之族潛龍在下
瞻鳥斯屋兆云其吉周爰咨詢旣契我龜又叶我人
鎬雖舊京其命惟新

右休氣

蜿蜒黃龍神池自出靈化恍惚噴雲沃日告帝之符
其儀孔吉或潛于泉或見于田與時順動亦應乎天
克配我皇無得稱焉

右黃龍

開元紀功德頌并序

臣聞變夷猾夏唐虞已然天之所生類不可絕嘗有
拓境者矣而固也爲患或有款塞者矣必也無親是
以古之哲王審其若此則限以荒服斷非純臣不貢
不王武功居後不庭不率文德是先三代所以直道
百蠻所以向化迨乎春秋之衰諸侯以力征伐自出
戎心大啓謀夏亂華干盟偪好王綱弛而若綴天道
厭而將革則有強能攘劫暴惡交侵雖雜霸之無成

亦及經之所取其負力者乃塹山堙谷盡境而築長城其黠武者則輓粟飛芻窮兵以耗中國又失於下策而悔在末年彼王畧之不恆殆千餘載矣夫有其虞而無像思其患而不圖所謂能國將安貴聖物豈終否道非固窮鑑之者昊天救之者英主玄命陰陽界付神武我太宗一戎衣而定我皇帝再受命而太平不是古而務文不非今而忘戰以特變而消息元與天而合符日月之所照臨陰陽之所陶冶凡有在地莫不稟朔而東夏郡縣北隴山戎先是四十年侵軼數百里自茲氣奪數以病告既威讓之不恭且力制之不可或朝或否爲虺爲蛇幽郭未遑以滅烽火邊城安得而弛柝曠日持久兵連禍挈率由事違是無寧歲二十二年春乃命右羽林大將軍兼御史中丞幽州長史張守珪將中軍都督諸鎮雄名先路夷裔生風載馳信臣繼發精卒戒嚴有赫張皇若神公卿大夫未始測也將校部曲亦莫知也皇帝方日靖以慮之乾綱以斷之初決策於九重已收功於萬里矣二十二年冬十有二月貴將命元戎受律三軍疾雷於非時二庭喪膽於非意欲遁則衆潰不保欲拒則兵鋒莫當因而僞降幸且紆禍遽圖反覆將肆

鴟張觀累先人豈伊負我以間諜而情得乘猜携而計從或奇兵以嘗或厚利以啗無何變作果自族誅兜元惡首鬼惑神誘假天威而無前覆巢而何有於是諸部大駭率衆復歸責以不義之尤捨其不臣之罪既服即序有威且懷載籍以來固未之見也昔我睿祖取句驪於拾遺今茲聖謀易林胡於反掌獻功有續後嗣無忘百王所廢之勳四夷未賔之俗自我底定魏乎登皇其若此也於是彼節使與群帥因東師之凱旋離而族談合而公議以爲主上憫一隅之苦垂不伐之畧以計易戰以信去兵神斷自天虜平不日且軍未血刃敵免膏原密承無方之謀坐致不陣之捷有征無戰即王者之師歟而不彰美於吾君得無臣子之罪不表聖於帝載曷稱文武之時乃率其屬至於固請帝三讓德而曰俞哉夫曲成萬類者天爲而不有下濟兆庶者聖成而不居物無謝生於天雖云至道人無歸功於聖何以最靈雖無已無名所宜絕於言象而惟忠與義固不廢於頌述大雅云徐方旣同天子之功又曰明明天子令聞不已其此之謂也臣再拜頓首敢獻頌曰

赫赫天威兮被遐荒蠢茲山戎兮不來王命南仲兮

整六師出幽陵兮轡九夷。歟赤山兮蕩滄海。弔無告兮伐有罪。徒不勤兮車不殆。虜震驚兮兵氣倍。昔負固兮今安在。魁自殲兮裔既平。謀既集兮聖自明。我不戰兮獻戎捷。俾厥後兮揚天聲。

聖應圖贊并序

臣聞啓聖者天也。宜有以覺悟受命者。聖也。必有以明徵故神不言。而可知時將至。而先兆當陛下龍潛上黨也。或託類於雲物。或效靈於卜筮。意者天之丁寧垂象。唯恐後時。又以潞水之泓。深山鹿之捷走。馳騎是獲。厲流不濡。非力所能。以明或躍乾之上。體時在九四。神道幽贊。聖期密邇。自後而占。何著明其若此。蓋天福海內地。降聖跡以瑞非常之后。以決如神之策。至于再三。明必信耳。有郡掾崔弼時其從行。見龍騎先馳。謂河流可涉。亦既數步。遽已滅頂。不沉也。安足以驗飛無凡也。於何以昭聖事。來自久命。常惟新臣不勝至願。謹爲聖圖遂獻贊曰。

龍之或躍。泉有可深。神亦成象。化爲肯禽。凌厲是攬。明命則忱。如彼從掾。焉能不沉。

開元正曆握乾符頌并序

臣伏見景寅制書以開元曆握乾符垂示天下。幸甚。

其沙門玄侶等所言益部耆舊傳洛下閎改顓頊曆推校最爲精密。而曰後八百歲其曆差一日。當有聖人定之。至于今曆果有差。聖果有定。誠非常之嘉應。曠代之靈符。不可得而間也。臣誠歡誠喜。臣聞天道先聖而啓期。聖人後天而奉時。不當乎天心不在曆數。不登乎聖道。不合元符。玄命定而王者應。幽數起而明者察。故洛下閎極其數而知來。耆舊傳尚其占而示後。我皇帝無思而感自然。玄同僧玄侶等幸會而言。豈云素慮非人事也。非神道也。天固已儲祥以俟。時積分以差。日出入數代多曆年所疇人極力不能課其祥上林雜候亦莫徵其失。則明天意以俟聖期。期數未臻。乃藏於密。聖證將至。如應如響。彼幽深之何有此會通之不謀。所以下叶黃鐘上稽玄象。以和六氣。以合三光。復其見心間不容髮。斗樞且運。而況於人時。元氣已調。而況於月令。於戲天下之動日用。不知昆蟲草木生者。自遂。麟鳳龜龍靈者。自瑞。蠻夷戎狄遠無不至。山川鬼神幽罔不洎。此聖人所以定天下之象。通天下之志。天人之道備也。昔者河出圖洛。出書自時。厥後符命非一空文。而無應其殆乎。人爲實錄。而有徵焉。用乎龍負。則洛下閎者。此其神。

乎不然是何見之明也夫聖有時而不作物無聖而不觀仲尼感時於鳳鳥古人嘆壽於清河皆傷於不達而恨於難見我后受成命重光乎文武累聖而無窮殊祥而無數彼哀命之者曾不得而朝聞凡今之人誠何幸而目覩由是觀之當其來運唐虞之屋可封非其有時孔丘之徒不遇此千載之會也萬物豈知其謝生於天乎兆人亦云忘力於帝乎微臣荷寵靈揚休命則臣子之志在於盡美而惟天之大終莫能名不勝區區敢獻頌曰

於皇惟后受命于天時來于今兆是厥先既定乃日允叶斯年赫赫光明應于上玄

白羽扇賦并序

開元二十四年夏盛暑奉勅使大將軍高力士賜宰臣白羽扇其與焉竊有所感立獻賦曰

當時而用在物所長彼鴻鵠之羽羽出江湖之下方安知煩暑可致清涼豈無紈素采畫文意復有脩竹剖析毫芒提携密邇搖動馨香惟眾珍之在御何短翮之敢當而竊思於聖后且見持於未央伊昔皐澤之時亦有雲霄之志苟效用之得所雖殺身之何忘肅肅白羽穆如微風縱秋氣之移奪終感恩於篋中

御批答

朕頃賜扇聊以滌暑卿立賦之且見情素詞高理妙朕詳之久矣然佳彼勁翮方資利用與夫弃捐篋笥義不當也

荔枝賦并序

南海郡出荔枝焉每至季夏其實乃熟狀甚瓌詭味持甘滋百菓之中無一可比余徃在西掖嘗盛稱之諸公莫之知而固未之信唯舍人彭城劉侯弱年遷累經于南海一聞斯談倍復喜歎以爲甘旨之極也又謂龍眼凡菓而與荔枝齊名魏文帝方引蒲桃及龍眼相比是時二方不通傳聞之大謬也每相顧開議欲爲賦述而世務卒卒此志莫就及理郡暇日追叙往心夫物以不知而輕味以無比而疑遠不可驗終然求屈况士有未效之用而身在無譽之間苟無深知與彼亦何以異也因道揚其實遂作此賦菓之美者厥有荔枝雖受氣於震方實稟精於火離乃作酸於此商爰負陽以從宜蒙休和之所播涉寒暑而匪虧下合圍以擢本傍蔭畝而抱規紫紋紺理蘊葉細枝蒼鬱而霽霽環合而焚纒如蓋之張如帷之垂雲煙沃若孔翠于斯靈根所盤不高不卑陋下澤之

沮如惡層崖之嶮巖彼前志之或妄何側生之見疵
爾其勾芒在辰凱風入律肇允含滋芬敷謚溢綠穗
靡靡菁莪必不豐其華但甘其實如有意乎敦本
故徵文而妙質蒂葑房而擡翠皮龍鱗以駢比膚玉
英而含澤色江萍以吐日朱苞剖明璫出罔然數寸
猶不可疋未玉齒而殆銷雖瓊漿而可軼彼眾味之
有五此甘滋之不一伊醇淑之無準非精言之能悉
聞者歡而竦企見者訝而驚饒心惠可以蠲忿口爽
可以忘疾且欲神於醴露何比數之相橘援蒲桃之
見擬亦古人之深疾若乃卑軒洞開嘉賓四會時當
煥煜客或煩憤而斯果在焉莫不心侈而體怵信雕
盤之仙液實玳筵之綺績有終食於累頁愈益氣而
治內故無厭於所甘雖不貪而必愛沉美李而莫取
浮甘瓜而自退豈一座之所榮冠四時之爲最夫其
貴可以薦宗廟其珍可以羞王公亭十里而莫致門
九重兮曷通山五嶠兮白雲江千里兮清楓何斯美
之獨遠嗟爾命之不工毋被銷於几口罕獲知於貴
躬柿可稱乎梁侯梨何幸乎張公亦因人之所遇孰
能辯乎其中哉

唐丞相曲江張先生文集卷之一

唐丞相曲江張先生文集卷之二

詩

奉和聖製二十七首

樂章二首

和酬諸公詩二十八首

奉和聖製南郊禮畢酺宴

配天昭聖業率土慶輝光
春發三條路酺開百戲場
流恩均庶品縱觀聚康莊
妙舞來平樂新聲出建章
分曹日抱戴赴節鳳歸昌
幸奏承雲樂同晞湛露陽
氣和皆有感澤厚自無疆
飽德君臣醉連歌奉柏梁

奉和聖製早渡蒲津關

魏武中流處軒皇問道迴
長堤春樹發高掌曙雲開
龍負王舟渡人占仙氣來
河津會日月天仗役風雷
東顧重關盡西馳萬國陪
還聞股肱郡元首詠康哉

奉和聖製幸晉陽宮

隋季失天策萬方罹凶殘
皇祖稱義旗三靈皆獲安
聖期將申錫王業成艱難
益移未改命曆在終履端
彼汾惟帝鄉洪都信鬱盤
一月朔巡狩群后陪清鑾
霸迹在沛庭舊儀覩漢官
唐風思何深舜典敷更寬
家蒙粉榆復邑爭牛酒歡
緬惟剪商後豈獨微雨歎

三后既在天萬年斯刊尊祖櫛皇天文皆仰觀

奉和聖製同二相南出雀鼠谷

設險諸侯地承平聖主巡東君朝二月南旆擁三辰
寒出重關盡年隨行漏新瑞雲業捧日芳樹曲迎春
舞詠先馳道恩華及從臣汾川花鳥意併本屬車塵
奉和聖製次成臯先聖擒建德之所

天命誠有集王業初惟艱剪商自文祖夷項在茲山
地識斬蛇處河臨飲馬間威加昔運往澤流今聖還
尊祖頌先烈賡歌安用攀紹成即我后封岱出天關

奉和聖製過王濟墓

漢皇思鉅鹿晉將在弘農入蜀舉長筭平吳成大功
興渾雖不協歸浩實爲雄孤績淪千載流名感聖衷
萬乘渡荒隴一顧凜生風古節猶不棄今人爭效忠

奉和聖製經孔子舊宅

丘門大山下不見登封時徒有先王法今爲明主思
恩加萬乘幸禮致一牢祠舊宅千年外光華空在茲

奉和聖製經河上公廟

昔者河邊叟誰知隱與仙姓名終不識章句此空傳
跡爲坐忘晦言猶強著詮精靈竟何所祠宇獨依然
道在紆宸睠風行動睿篇從茲化天下清淨復何先

奉和聖製賜諸州刺史以題坐石

聖人合天德洪覆在元元每勞蒼生念不以黃屋尊
興化俟群辟擇賢守列藩得人此爲盛咨岳今復存
降鑒引君道慙敷啓政門容光無不照有象必爲言
成憲知所奉致理歸其根肅肅稟玄猷煌煌戒朱軒
豈徒任遇重兼爾宴錫繁載聞勵臣節持答明主恩

奉和聖製瑞雪篇雜言

萬年春三朝日上御明臺旌庭實初瑞雪兮霏微俄
同雲兮蒙密此時驟切陰風生先過金殿有餘清信
宿嬋娟飛雪度能使玉人俱掩嬈皓皓樓前月初白
紛紛陌上塵皆素昨訝驕陽積數旬始知和氣待迎
新匪惟在人利曾是扶天意天意豈云遙雪下不崇
朝皇情既無數雪委方盈尺草樹紛早榮京坻宛先
積君恩誠謂何歲稔復人和預數斯箱慶應如此雪
多朝冕旒兮載悅想鑒笠兮農節倚瑤琴兮或歌續
薰風兮瑞雪福浸昌應尤盛瑞雪年年常感聖願以
栢梁作長爲柳花詠

奉和聖製早發三鄉山行七言

羽衛森森西向秦山川歷歷在清晨晴雲稍卷寒巖
樹宿雨能銷御路塵聖德由來合天道靈符即此應

時巡遺賢一一皆羈致猶欲高深訪隱淪

奉和聖製溫泉歌雜言

有時神物待聖人去後湯還冷來時樹亦春今茲十月自東歸羽旆遠迤上翠微溫泉恣恣佳氣色離宮奔奔斗光輝臨渭川近天邑浴日溫泉復在茲群仙洞府那相及吾君利物心玄澤浸蒼黔漸漬神湯無疾苦薰歌一曲感人深

奉和聖製燭龍齋祭四言

上帝臨下鑒亦有光孰云陰陽惟聖克彰六月徂暑四郊僭陽我后其勤告于壇場精意克溢群靈鼓舞蔚兮朝雲霈然時雨雨我原田亦既有年燭龍煌煌明宗報祀于以助之天人帝子聞詩有訓國風茲始

奉和聖製喜雨四言

艱我稼穡載育載亭如物應之曷聖與靈謂我何憑惟德之馨誰云天遠以誠必至太清無雲義和頻轡于斯蒸人瞻彼非覲陰冥倏忽需澤咸洎何以致之我后之感無臯無隰黍稷黷黷無卉無木敷芬黷黷黃龍勿來鳴鳥不思人和年豐皇心則怡豈與周宣雲漢徒詩

奉和聖製送十道採訪使及朝集使

三年一上計萬國趨河洛課最力已陳賞延恩復博垂衣深共理改瑟其成若首路迴竹符分鑣揚木鐸戒程有攸往詔餞無淹泊昭晰動天文殷勤在人瘼持久望茲念克終朝所託行已當自強春耕庶秋獲

奉和聖製次瓊岳韻

山祗亦望幸雲雨見靈心岳館逢朝霽關門解宿陰咸京天上近清渭日邊臨我武因冬符何言是即禽

奉和聖製送李尚書入蜀

眷言感忠義何有間山川徇節今如此離情空復然皇心在勤恤德澤委昭宣周月成功後明年或勞還

奉和聖製初出洛城

東土淹龍駕西人望翠華山川祗詢物宮觀豈爲家十月星廻斗十官日捧車洛陽無怨思巡幸更非賒

奉和聖製謁元皇帝廟齋

興運昔有感建祠北山巔雲雷初締構日月今悠然紫氣尚鬱鬱玄元如在焉迨茲事追遠輪奐復增鮮洞府杳林處泰嶽清溪邊吾君乃尊祖夙駕此留連樂動人神會鐘成律度圓笙歌下鸞鶴芝木萃靈僊曾是福黎庶豈唯味虛玄賡歌徒有作微薄謝昭宣

南郊文武出入舒和之樂四言樂章

祝史辭正人神慶叶福以德昭享以誠接六變云備百禮斯決祀事孔明祚流萬葉

奉和聖製龍池篇

天啓神龍生碧泉泉水靈源浸迤延飛龍已向珠潭出積水仍將銀漢連岸傍花柳看勝盡浦上樓臺問是仙我后元符從此得方爲萬歲壽圖川

南郊太尉酌獻武舞作凱安之樂

樂章

馨香惟后德明命光天保肅祀崇聖靈陳信表皇道玉戚初蹈厲金匏既靜好介福何穰穰精誠格穹昊

奉和聖製送尚書燕國公赴朔方

宗臣事有征廟算在休兵天與三台座人當萬里城朔南方偃革河陽暫揚旌寵錫從仙禁光華出漢京山川勤遠略原隰軫皇情爲奏薰琴唱仍題寶劔名聞風六郡勇計日五戎平山甫歸應疾留侯功復成歌鍾旋可望枕席豈難行四牡何時入吾君憶履聲

奉和聖製途經華山

萬乘華山下千岩雲漢中靈居雖空密睿覽忽玄同日月臨高掌神仙仰大風嶺峯勢岌岌翊輦氣雄雄揆物知幽贊銘勳表聖衷會應陪檢玉來此告成功

奉和聖製早登太行山率爾言志

五月攝提貞乘時我后征晨嚴九折度暮戒六軍行日御馳中道風師卷太清戈鉞林表出組練雪間明動植希皇豫高深奉睿情陪遊七聖列望幸百神迎氣色煙猶喜恩光草尚榮足果稱萬歲今此復同聲

奉和聖製登封禮畢洛城酺宴

大君畢能事端宸樂成功運與千齡合懽將萬國同漢醴歌聖酒韶樂舞薰風河洛榮光遍雲煙喜氣通春華頓覺早天澤倍加崇草木皆沾被猶言不在躬

奉和聖製經函谷關作

函谷雖云險黃河復已清聖心無所隔空此置關城

奉和聖製渡潼關口號

隱嶙故城壘荒涼空戍樓在德不在險方知王道休

奉和吏部崔尚書雨後大明朝堂望南山

迢遞終南頂朝朝閭闔前謁來青綺外高在翠微先雙鳳寨爲關群龍儼若仙還知到玄圃更是謁甘泉夜雨塵初滅秋空月正懸詭容紛入望霽色宛成妍東極華陰踐西彌嶠冢連奔峯出嶺外瀑水落雲邊漢帝宮將苑商君陌與阡林間鋪近甸煙靄遶晴川旣庶仁斯及分憂政已宣山公啓事罷吉甫頌聲傳濟濟金門步洋洋玉樹篇徒歌雖有屬清越豈同年

和黃門盧監望秦始皇陵

秦帝始求仙驪山何遽卜中年既無效茲地所宜復
徒役如雷奔环怪亦雲蓄黔首無寄命赭衣相馳逐
人怨神亦怒身死宗遂覆土崩失天下龍闕入函谷
國爲項籍屠君同華元戮始掘旣由楚終焚乃因牧
上宰議揚賢中阿感桓速一聞過秦論載懷空杼軸
蘇侍郎紫微庭各賦一物得芍藥

仙禁生紅藥微芳不自持幸因清切地還遇艷陽時
名見桐君錄香聞鄭國詩孤根若可用非直愛華滋
和崔黃門寓直夜聽蟬之作

蟬嘶玉樹枝向夕惠風吹幸入連霄聽應緣飲露知
思深秋欲近聲靜夜相宜不是黃金飾清香徒爾爲
和姚令公從幸溫湯喜雪

萬葉飛黃馬千金孤白裘正逢銀霰積如向王京遊
瑞色鋪馳道花文拂綵旒還聞吉甫頌不共郢歌儔

和秋夜望月憶韓席等諸侍郎因以投贈吏

邵侍郎李林甫

秋天碧雲夜明月懸東方皓皓庭際色稍稍林下光
桂華渙遠近璧綵散池塘鴻鴈飛難度關山曲易長
揆予秉孤直虛薄忝文章握鏡慙先照持衡愧後行

多才歟君子載筆久辭塲作賦推潘岳題詩許謝康
當時陪宴語今夕恨相忘願欲接高論清晨朝建章
和吏部李侍郎見示秋夜望月憶諸侍郎之

什其卒章有前後行之戲因命僕繼作

清秋數高興涼月復閉霄光逐露華滿情因水鏡搖
同持亦所見異路無相招美景向空盡歡言隨事銷
忽聽金華作誠如玉律調南宮尚爲後東觀何其遽
名數雖云隔風期幸未遙今來重餘論懷此更終朝
和崔尚書喜雨

積陽雖有晦經月未爲災上念人天重先祈雲漢迴
仁心及草木號令起風雷照爛陰霞上六紛瑞雨來
三辰破黍稷四達屏氛埃池溜因添滿林芳爲洒開
聽中聲滴瀝空處影徘徊惠澤成豐歲昌言發上才
無論驗石鼓不是御雲臺直頌皇恩浹宗朝遍九垓
和王司馬折梅寄京邑昆弟

離別念同孀方榮欲共持獨攀南國樹遙寄北風時
林倩迎春早花愁去日遲還聞折梅處更有棣華詩

和許給事直夜聞諸公

未央鐘漏晚仙宇藹沉沉武衛千廬合嚴扃萬戶深
左掖知天近南窓見月臨樹搖金掌露庭徙玉樓陰

他日聞更直中霄屬所欽聲華大國寶夙夜近臣心
逸興乘高閣雄飛在禁林寧思竊抃者情發爲知音
和裴侍中承恩拜掃旋轡途中有懷寄州縣
官寮鄉園故親

嵩岳神惟降汾川鼎氣雄生才作霖雨繼代有清通
天下稱賢相朝端挹至公自家來佐國移孝入爲忠
霜露多前感丘園想舊風扈巡過晉北問俗到河東
便道恩華降還鄉禮教崇野博延故老朝服見兒童
和姚令公哭李尚書

貴賤雖殊等平生竊下風雲泥勢已絕山海納還通
忽嘆登龍者翺將平鶴同琴詩猶可託劒履獨成空
疇昔嘗論體與言每匪躬人思崔琰議朝掩祭遵公
作善神何酷依仁命不融天文靈北斗人事罷南宮
上宰旣傷舊下流迷感衷無恩報國士徒欲問玄穹
張丞相與余有孝廉校理之舊又代余爲荆
州故有此贈襄州刺史宋鼎

漢上登飛幘荆南歷舊居已嘗臨砌橋更覩躍池魚
盛德繼微眇深衷能卷舒義申蓬閣際情坦廟堂初
郡挹文章美人懷燮理餘皇恩儻照亮豈厭承明廬
酬宋使君作

時來不自意宿昔謬樞衡翊聖負明主妨賢媿友生
罷歸猶右職待罪尚南荆政有留裳舊風因繼組成
高軒問疾苦蒸庶荷仁明衰廢時所薄祗言僚故情
酬通事舍人寓直見示篇中兼起居陸舍人

景獻

軒掖殊清秘才華固在斯興因膏澤洒情與惠風吹
所美應人譽何私亦我儀同聲感喬木比翼謝長離
價以陸生減賢慙鮑叔知薄遊嘗獨愧芳訊乃兼施
此夜金閨籍伊人瓊樹枝飛鳴復何遠相顧幸媿媿
和黃門盧侍郎詠竹

清切紫庭垂葳蕤防露枝色無玄月變聲有惠風吹
高節人相重虛心世所知鳳皇佳可食一去一來儀
和蘇侍郎小園夕霽寄諸弟

清風闔闔至軒蓋承明歸雲月愛秋景林堂開夜扉
何言無濟日尚與宴私違興屬蕪葭變文因棠棣飛
人倫用忠厚帝德已光輝贈弟今爲貴方知陸氏微
和韋尚書荅梓州兄南亭宴集

棠棣聞餘興烏衣有舊遊門前杜城陌池上曲江流
暇日嘗繁會清風詠阻修始知西峙嶽同氣此相求
與袁補闕尋蔡拾遺會此公出行後蔡有五

韻詩見贈以此篇荅焉

轍迹陳家巷詩書孟子鄰偶來乘輿者不值草玄人
契是忘年合情非累日申聞君還薄暮見眷及茲辰
贈我如瓊玖將何報所親

酬趙二侍御使西軍贈兩省舊寮

石室先鳴者金門待制同操刀嘗願割持斧竟稱雄
應敵兵初起緣邊虜欲空使車經隴月征旆繞河風
忽枉兼金訊非徒秣馬功氣清蒲海內聲滿相臺中
顧已塵華省欣君震遠戎明時獨匪報嘗欲退微躬

荅陳拾遺贈竹簪

與君嘗此志因物復知心遺我鍾龍節非無玳瑁簪
幽素宜相重雕華豈所任爲君安首飾懷此代兼金
荅太常靳博士見贈一絕

上苑春先入中園花盡開惟餘幽徑草尚待日光催

酬宋使君見貽

陝隲初稟訓獻策幸逢時朝列且云忝君恩復若茲
庭闈際海曲輶傳荷天慈顧已歡烏鳥聞君泣素絲
才明應主召福善豈神欺但願白心在終然涅不緇
武司功初有幽庭春暄見詒夏首獲見以詩

報焉

芳月盡離居幽懷重起予雖言春事晚尚想物華初
遲日瞰方照高齋澹復虛笋成林向密花落樹應疎
贈鯉情無間求鶯思有餘暄妍不相待含歎欲焉如

贈澧陽韋明府

君有百鍊刃堪斷七重犀誰開太阿匣持割武城雞
竟與尚書佩還應天子提何時遇操宰當使王如泥
酬周判官巡至始興會改秘書少監見貽之

作兼呈耿廣州

惟昔遷樂土迄今已重世陰慶荷先德素風斬後裔
唯益梓桑恭稟山川麗于時初自勉揆已無兼濟
瘠土資勞力良書啓蒙蔽一探石室文再揮金門第
既起南宮草復掌西掖制過舉及小人便番在中歲
亞司河海秩轉牧江湖蒞勿謂符竹輕但覺涓塵細
一麾尚云忝十駕宜求稅心息已如灰跡率且爲贅
忽捧天書委將華海隅弊朝聞循誠節夕飲蒙瘴厲
義疾耻無勇盜憎攻亦銳茲藿是傾心豺狼何返噬
履險井所受勞賢惡相戾攬轡但荒服循坊便私第
嘉慶始獲申恩華復允繼無庸我先舉同事君猶滯
當推奉使績且結拜親契更延懷安肯曾是慮危際
籌謀雖若茲至理焉可替所仗有神道况承明主惠

在洪州峇慕母學士

旬雨不愆期由來自若時爾無言郡政吾豈欲天欺
常念消塵益惟歡草樹滋課成非所擬人望在東蓂

酬王六靈後書懷見示

雲雨俱行罷江天已洞開炎氛霽後減邊緒望中來
作驥君垂耳爲魚我曝鰓更憐湘水賦還是洛陽才

酬王六寒朝見詒

賈生流寓日楊子寂寥時在物多相背唯君獨見思
漁爲江上曲雪作郢中詞忽枉兼金訊長懷伐木詩

酬王履震遊園林見詒

宅生惟海縣素業守郊園中覽霸王說上激明主恩
一行罷蘭徑數載歷金門既負潘生拙俄從周任言
逶迤戀軒陛蕭散及丘壠舊徑稀人跡前池耗水痕
併看芳樹老唯覺弊廬存自我棲幽谷逢君翳覆盆
孟軻應有命賈誼得無冤江上傷行遠林門偶避喧
地偏人事絕時霽鳥聲繁獨善心俱閉窮居道共尊
樂因南澗澡憂豈北堂萱幽意如投漆新詩重贈軒
平生徇知己窮達與君論

唐丞相曲江張先生文集卷之二

唐丞相曲江張先生文集卷之三

詩

雜著五十首

登南岳事畢謁司馬道士

將命祈靈岳迴策詣真士絕跡尋一徑異香聞數里
分庭八桂樹肅容兩童子入室希把神登床願啓齒
誘我棄智訣迫茲長生理吸精及自然鍊藥求不死
斯言眇霄漢顧子嬰紛滓相去九牛毛慙嘆知何已

登樂遊春望書懷

城隅有樂遊表裏見皇州策馬既長遠雲山亦悠悠
萬壑精光滿千門喜氣浮花間直城路草際曲江流
憑眺茲爲美離居方獨愁已驚玄髮換空度綠莢柔
奮翼龍中鳥歸心海上鷗既傷日月逝且欲桑榆收
豹變焉能及鸞鳴非可求願言從所好初服返林丘

登襄陽恨峴山

昔年亟攀踐征馬復來過信若山川舊誰知歲月何
蜀相吟安在羊公碣已磨令圖猶寂寞嘉會亦蹉跎
宛宛樊城岸悠悠漢水波逶迤春日遠感寄客情多
地本原林秀朝來煙景和同心不同賞留歎此巖阿

九月九日登龍山